

Na osnovu člana 56. Zakona o organizaciji uprave u Federaciji Bosne i Hercegovine ("Službene novine Federacije BiH", broj: 35/05), člana 30. stav (1) i člana 37. Zakona o izvršavanju Budžeta Federacije Bosne i Hercegovine za 2020. godinu ("Službene novine Federacije BiH", broj 99/19) i tačke III Odluke Vlade Federacije Bosne i Hercegovine o usvajanju Programa utroška sredstava sa kriterijima raspodjele sredstava "Tekući transferi pojedincima - za pomoć u liječenju boraca-branitelja" utvrđenog budžetom Federacije Bosne i Hercegovine za 2020.godinu V.broj:265/2020 od 20.02.2020.godine ("Službene novine Federacije BiH", broj 15/20), federalni ministar za pitanja boraca i invalida odbrambeno-oslobodilačkog rata/federalni ministar za pitanja branitelja i invalida domovinskog rata, objavljuje:

JAVNI POZIV

za ostvarivanje prava na dodjelu sredstava za jednokratnu novčanu pomoć u liječenju članova uže porodice poginulih branilaca, porodice umrlih ratnih vojnih invalida i porodice umrlih dobitnika najvećih ratnih priznanja i odlikovanja u 2020.godini

I

Predmet Javnog poziva je odobravanje jednokratne novčane pomoći u liječenju članova uže porodice poginulih branilaca, umrlih ratnih vojnih invalida i umrlih dobitnika najvećih ratnih priznanja i odlikovanja iz sredstava "Tekući transferi pojedincima - za pomoć u liječenju boraca-branitelja" utvrđenog u razdjelu 32 ekonomski kod 614200 Budžeta Federacije Bosne i Hercegovine za 2020. godinu ("Službene novine Federacije BiH", broj 99/19).

II

Pravo učešća na ovom Javnom pozivu imaju fizička lica koja pripadaju kategoriji branilačkih/braniteljskih populacija: članovi uže porodice poginulih branilaca, umrlih ratnih vojnih invalida i umrlih dobitnika najvećih ratnih priznanja i odlikovanja.

Pod članom uže porodice iz stava (1) ovog člana smatraju se roditelji, bračni partner i djeca do navršene 25 godine života, što je bliže regulisano Pravilnikom o kriterijima, uslovima, načinu i postupku odobravanja jednokratne novčane pomoći za liječenje članova uže porodice poginulih branilaca, umrlih ratnih vojnih invalida i umrlih dobitnika najvećih ratnih priznanja i odlikovanja u 2020.godini broj: 01-37-697/20 od 03.03.2020. godine (u daljem tekstu: Pravilnik).

Sredstva iz tačke I ovog poziva dodjeljivat će se u visini 1/12 raspoloživih sredstava, u skladu sa općim i posebnim kriterijima za dodjelu jednokratne pomoći za liječenje.

III

Opći kriteriji za odobravanje jednokratne novčane pomoći u liječenju su:

- a) ima prijavljeno mjesto prebivališta na području Federacije BiH, odnosno mjesto boravišta u statusu povratnika u entitet Republiku Srpsku i Brčko Distrikt Bosne i Hercegovine;
- b) dokaže pripadnost Oružanim snagama u trajanju od najmanje 12 (dvanaest) mjeseci (za poginulog branioca, umrlog RVI i umrlog dobitnika najvećeg ratnog priznanja ili odlikovanja);
- c) priloži odgovarajuću medicinsku dokumentaciju ne stariju od jedne godine od dana podnošenja zahtjeva;
- d) nije ostvario pravo na pomoć za plaćanje troškova liječenja po istom osnovu prema drugim propisima.

IV

Pored općih kriterija definisanih tačkom III Javnog poziva, kod odobravanja jednokratnih novčanih pomoći za liječenje, vrednuju se i slijedeći kriteriji:

1. Lica iz tačke II javnog poziva prijavu za ostvarivanje prava na jednokratnu novčanu pomoć mogu podnijeti za sebe ili za člana uže porodice, a ovo pravo se može ostvariti jednom u toku budžetske godine;
2. Pravo na jednokratnu pomoć se ostvaruje pod uslovom da podnosilac prijave nije već ostvario pravo na pomoć u liječenju kod ovog organa u 2020. godini, izuzev ukoliko se to odnosilo na liječenje najtežih oboljenja kao što su: maligna oboljenja, leukemije, paralize, oboljenja koja se liječe van teritorije Bosne i Hercegovine i druga teška oboljenja, a čije liječenje zahtjeva kontinuirano velika finansijska sredstva, pod uslovom da podnosiocu prijave nisu odobrena sredstva za liječenje po federalnim i kantonalnim programima zdravstvene zaštite u tekućoj godini;
3. Podnosilac prijave i članovi njegove uže porodice koji su uposlenici državnih, federalnih, kantonalnih ili općinskih organa uprave, upravnih organizacija, javnih ustanova ili javnih preduzeća, ostvaruju pravo na jednokratnu pomoć za liječenje pod uslovom da nisu već ostvarili pravo na pomoć za liječenje iz budžetskih sredstava;
4. Liječenjem u smislu ovog Javnog poziva ne smatra se banjско-klimatsko liječenje i nabavka ortopedskih pomagala, izuzev za podnosioca prijave koji imaju status povratnika u Republiku Srpsku i lica iz Brčko Distrikta za koje se nabavka ortopedskih pomagala smatra troškovima liječenja ukoliko ne mogu ostvariti pravo na ortopedsko pomagalo ili nisu oslobođeni participacije troškova nabavke istih;
5. Prilikom odobravanja sredstava vodit će se računa o težini i prirodi bolesti, hitnosti slučaja, broju podnesenih zahtjeva i iznosu raspoloživih novčanih sredstava;
6. Prioritet kod odobravanja sredstava imaju teška oboljenja kao što su: maligna oboljenja, endemska nefropatija, hirurške intervencije na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenja mišićnog sistema, paralize i druga teška oboljenja.

V

Prijava za dodjelu sredstava jednokratne novčane pomoći za liječenje se podnosi na obrascu koji se može preuzeti na web stranici ministarstva (www.fmbi.gov.ba) ili u prostorijama pisarnice ovog ministarstva.

Uz prijavu, podnosioci su dužni dostaviti **original ili ovjerene kopije** slijedeće dokumentacije:

1. *CIPS prijava (za podnosioca prijave i za člana uže porodice za kojeg se podnosi prijava);*
2. *Kućna lista - u slučajevima kada podnosilac prijave ne podnosi zahtjev za dodjelu jednokratne novčane pomoći za vlastito liječenje već za pomoć u liječenju drugog člana uže porodice (roditelji, bračni partner i djeca do navršene 25 godine života) kako bi dokazao da sa istim u momentu podnošenja zahtjeva živi u zajedničkom domaćinstvu.*
3. *Izvod iz matične knjige rođenih, umrlih ili vjenčanih (za podnosioca prijave i za člana uže porodice poginulih branilaca, umrlih ratnih vojnih invalida i umrlih dobitnika najvećih ratnih priznanja za kojeg se podnosi prijava) ne starije od 6 mjeseci.*
4. *Uvjerenje od nadležne Grupe/Samostalnog izvršioca za pitanja evidencija iz oblasti vojne obveze za poginulog, umrlog ili nestalog pripadnika Oružanih snaga RBiH sa podacima o okolnostima stradanja ili rješenje o priznavanju prava na porodičnu invalidninu iza poginulog/umrlog branioca (ne starije od 6 mjeseci).
Za umrle ratne vojne invalide – posljednje rješenje o priznavanju prava po osnovu vojnog invaliditeta ili posljednje rješenje o priznavanju prava na porodičnu invalidninu poslije smrti ratnog vojnog invalida.
Za umrle dobitnike ratnih priznanja i odlikovanja uvjerenje ili posljednje rješenje o priznavanju prava na mjesečni novčani dodatak po osnovu priznanja i odlikovanja.*

5. *Potvrda/uvjerenje od nadležnog općinskog ili kantonalnog organa uprave prema mjestu prebivališta da li je ostvareno pravo na pomoć za liječenje u 2020.godini, te ako jeste u kojem iznosu;*
6. *Za podnosioca prijave i članove njegove uže porodice koji su uposlenici državnih, federalnih, kantonalnih ili općinskih organa uprave, upravnih organizacija, javnih ustanova ili javnih preduzeća, dokaz da nije u 2020.godini ostvarena pomoć za liječenje iz budžetskih sredstava*
7. *Dokaz o zdravstvenom stanju (medicinska dokumentacija) podnosioca prijave ili člana uže porodice izdat od strane ovlaštene zdravstvene ustanove ili stručnog tima - konzilijuma, ne stariji od godinu dana (nije obavezna ovjera)*
8. *Za liječenje u inostranstvu: prijedlog univerzitetsko-kliničke bolnice (kliničke zdravstvene ustanove) koja se bavi liječenjem oboljenja za koje se traži odlazak na liječenje u inostranstvo, sa mišljenjem liječničkog konzilija izdatog saglasno Pravilniku o postupku i načinu rada liječničkog konzilijuma ("Službene novine FBiH", broj 55/13)*
9. *Potvrda banke sa brojem tekućeg računa podnosioca zahtjeva ili kopija tekućeg računa podnosioca prijave*

VI

Komisija za pomoć u liječenju Federalnog ministarstva za pitanja boraca invalida odbrambeno-oslobodilačkog rata ovog ministarstva vrši razmatranje zaprimljenih prijava i daje obrazložen prijedlog za dodjelu sredstava jednokratne novčane pomoći federalnom ministru koji isti odobrava i donosi konačna rješenja o odobravanju jednokratne novčane pomoći.

VII

Prijave se podnose na pisarnicu Federalnog ministarstva za pitanja boraca i invalida odbrambeno-oslobodilačkog rata/Federalnog ministarstva za pitanja branitelja i invalida domovinskog rata u Sarajevu – za Komisiju za pomoć u liječenju, u ulici Hamdije Čemerlića broj 2/VIII ili putem pošte.

Krajni rok za dostavljanje prijava ističe **31.10.2020.** godine.

VIII

Nepotpune i neblagovremene prijave neće se uzimati u razmatranje.

Broj: 01-37-698/20
Sarajevo, 04.03.2020. godine

